

PRIRODNO-MATEMATIČKI FAKULTET
UNIVERZITETA U SARAJEVU

OKOLINSKA POLITIKA

Preporuke i mjere za poboljšanje odnosa prema okolini

Postojeće stanje odnosa prema okolini u Bosni i Hercegovini moguće je poboljšati definisanjem odgovarajućih mjera i aktivnosti, koje bi kontinuirano provodili organi uprave na različitim nivoim, kao i institucije različite namjene. To se odnosi na preduzeća, obrazovne institucije, kao i nevladine organizacije i udruženja građana.

Krovnim Zakonom o zaštiti okoline utvrđeni su opšti ciljevi i načela, osnovni principi zaštite komponenti okoliša, principi informiranja i edukacije o okolini, način učešća javnosti i pristup informacijama o stanju okoline, nadležnosti ministarstava, način planiranja zaštite okoline, elementi procjene uticaja na okoliš, način izdavanja okolinskih dozvola i sprečavanje akcidentnih situacija, komponente i načini dobrovoljnog pristupa od strane preduzeća, nadzor i uspostavljanje standarda kvaliteta okoline, način finansiranja zaštite okoline, građanska odgovornost za zaštitu, kao i kaznene odredbe u skladu sa ovim Zakonom.

Posebnim zakonima regulisana su pitanja zaštite po pojedinim sferama okoline: priroda, zrak, voda, odlaganje čvrstog otpada, korištenje prostora i građenje. Implementacija ovih zakona nameće potrebu ozbiljnog pristupa u blagovremenom donošenju ne samo svih potrebnih pratećih propisa za njihovu operacionalizaciju i efektivnu primjenu, nego i usvajanje pravila ponašanja na nivou institucija.

Pomenuti zakoni obavezuju i obrazovne institucije da istražuju način obezbjeđenja njihovog provođenja u smislu dorade programskih sadržaja, monitoringa primjene i praćenja parametara kvaliteta životne sredine, te odstupanja od utvrđenih standarda.

U tom smislu, a u vezi sa vlastitim radnim procesima, Prirodno-matematički fakultet donosi **Deklaraciju o okolinskoj politici** kao institucionalno određenje prema aktuelnim zahtjevima brige o životnoj sredini.

Deklaracija o okolinskoj politici

Prirodno-matematički fakultet Univerziteta u Sarajevu je opredijeljen u nastojanju da kroz istraživačke i obrazovne aktivnosti doprinosi održivom razvoju Bosne i Hercegovine.

Suštinu istraživačkih i obrazovnih procesa na Fakultetu čine discipline prirodnih i matematičkih nauka. Smatramo da nam je time dodijeljena i velika odgovornost po pitanju brige prema prirodi i okolišu.

Naše opredjeljenje da doprinosimo očuvanju i podizanju kvaliteta pojedinih sfera okoliša podrazumijeva:

- Unapređenje kulture poštivanja propisa i provođenje zakonske regulative iz oblasti zaštite okoline, kako u obrazovnoj praksi, tako i u institucionalnom životu Fakulteta;
- Integraciju okolinskih znanja i svijesti u sve aspekte obrazovanja na Fakultetu, naročito kroz kontinuirano inoviranje nastavnih programa i sadržaja;
- Povećanje broja relevantnih nastavnih jedinica u sadržajima koji uključuju aspekt odnosa sa okolinom i tretiraju: fizičko-hemijske karakteristike okoliša, očuvanje i održivu upotrebu biodiverziteta i geodiverziteta, zaštitu prirodnog nasljeđa, racionalno korištenje prostora, upotrebu i efekte rizičnih supstanci i hemikalija, te procjenu kapaciteta naše zemlje za razvoj održivih grana privrede;
- Aktivno učešće u društvenim procesima koji doprinose kolektivnom razvoju i primjeni okolinske svijesti;
- Razvoj sopstvenog sistema okolinski usaglašenog upravljanja, koji će se provoditi kroz redovne aktivnosti godišnjeg plana, aktivnosti plana za realizaciju sistema kvaliteta, te aktivnosti usklađivanja internih sadržaja sa zahtjevima tržišta rada i lokalne zajednice. Sistem okolinski usaglašenog upravljanja ima sljedeće ciljeve:
 - ✓ Kontinuirano razvijati i primjenjivati mjere za povećanje ekološke svijesti;
 - ✓ Kreirati materijalnu i tehničku usaglašenost obrazovnih, istraživačkih i institucionalnih procesa sa zahtjevima važeće regulative;
 - ✓ Koristiti vlastite resurse na ekonomičan način;
 - ✓ Pratiti procese na Fakultetu koji mogu imati negativne uticaje na okoliš i smanjivati njihov uticaj;
 - ✓ Promovirati i podržavati inicijative, programe i projekte za očuvanje i zaštitu okoliša, kao i održivu upotrebu njegovih komponenti;
 - ✓ Kreirati vlastiti obrazovni brend, prepoznatljiv po odnosu prema okolišu.

U cilju ostvarenja svoje okolinske politike, Prirodno-matematički fakultet je spreman da sarađuje sa svim članicama Univerziteta u Sarajevu, kao i svim drugim lokalnim i međunarodnim institucijama, koje prepoznaju važnost brige o okolišu u procesu obrazovanja.

Sarajevo, 05.11.2015. godine

DEKAN FAKULTETA

Prof. dr. Rifat Škrijelj